

Sarajevo, 18.08.2026.

Broj: 100-00-1613/26

Office of the High Representative – OHR

n/r Louis J. Crishock

Visoko sudsko i tužilačko vijeće Bosne i Hercegovine

n/r Sanin Bogunić, predsjednik VSTV

Sindikat pravosuđa Republike Srpske

Siniša Petrović, predsjednik

Poštovani,

Obraćamo vam se sa zahtjevom za **hitnu i odlučnu reakciju** u cilju zaštite integriteta pravosudnog sistema te lične i profesionalne sigurnosti sudija u Republici Srpskoj. Svjedoci smo nezapamćene i orkestrirane medijsko-političke kampanje (hajke) usmjerene protiv sudija koji postupaju ili tek trebaju donijeti odluke u izvršnim i parničnim predmetima koje **Radiotelevizija Bosne i Hercegovine (BHRT)** vodi protiv **Radio-televizije Republike Srpske (RTRS)** radi naplate zakonom definisanog prihoda od RTV takse.

Pravosudni postupci koji se vode pred sudovima u Republici Srpskoj imaju ogroman značaj za opstanak i funkcionisanje BHRT-a, javnog RTV servisa na nivou države. Međutim, posljednjih dana umjesto zakonitog i neometanog vođenja sudskih procesa, sudije se suočavaju sa javnim linčom, političkim etiketiranjem i direktnim prijetnjama zvaničnika i medija pod kontrolom vlasti u RS. U programima RTRS-a sudije koje donose odluke u skladu sa zakonom javno se proglašavaju "izdajnicima", optužuju se za rad protiv interesa entiteta i na taj način se na njih vrši direktan utjecaj s ciljem donošenja presuda u korist RTRS-a.

Stvara se i atmosfera straha i nesigurnosti u kojoj se sudijama onemogućava da slobodno, nepristrasno i nezavisno primjenjuju zakone i donose odluke na osnovu dokaza u spisima predmeta. Izjave u programima RTRS-a predstavljaju „crtanje mete na čelo“ sudiji. Dovoljno je da jedan od 600 radnika napravi pogrešan potez koji može izazvati ozbiljne posljedice.

Iako ne vjerujemo u hitnu i posebnu reakciju RAK-a BiH, u ovom slučaju istom smo uputili prigovor i podsjetili na Kodeks o audiovizuelnim medijskim uslugama i medijskim uslugama radija kojim je propisano da će se u audiovizuelnim medijskim uslugama i medijskim uslugama radija poštovati ljudsko dostojanstvo i osnovna prava drugih, neće prenositi jasan i neposredan rizik od uzrokovanja negativnih posljedica koje uključuju, ali se ne ograničavaju na smrt, povrede, štetu nanesenu imovini ili drugu vrstu nasilja ili ometanje policijskih aktivnosti i medicinskih usluga ili aktivnosti drugih službi za održavanje javnog reda i sigurnosti.

Članom 5. Kodeksa propisano je da će se osigurati da svi programski sadržaji, a naročito informativno-politički i programi o tekućim događajima, budu pravični, nepristrasni i izbalansirani. Pravičnost, nepristrasnost i izbalansiranost postižu se objavljivanjem svih suprotstavljenih stavova, bilo u istom programu ili u nizu drugih programa koji predstavljaju

cjelinu u obradi određene tematike. Posebno ističemo da je članom 15. stav 3. Kodeksa propisana obaveza Pružaoca medijske usluge da u toku trajanja sudskog postupka, poštiva pravo na privatnost svih lica uključenih u taj postupak u bilo kojem svojstvu.

Ono što je najvažnije **ovakav javni narativ direktno podriva ustavni poredak Bosne i Hercegovine i grubo krši principe podjele vlasti**, pretvarajući pravosuđe u metu političkih obračuna.

Imajući u vidu da **prema Aneksu 10 Dejtonskog mirovnog sporazuma**, Visoki predstavnik je konačni autoritet za provođenje civilnih aspekata mirovnog ugovora, što direktno **uključuje zaštitu institucija vladavine prava i osiguranje nesmetanog rada pravosuđa od političkih blokada i pritisaka** i da **prema Zakonu o VSTV-u BiH**, Vijeće ima izričitu zakonsku obavezu da **osigura nezavisno, nepristrasno i profesionalno pravosuđe** i da član 17. Zakona nalaže VSTV-u da **interveniše i štiti sudije i tužioce** čija je nezavisnost ugrožena političkim ili bilo kojim drugim vanjskim utjecajima.

Zbog ovlasti koje imaju, od **Ureda visokog predstavnika (OHR) i Visokog sudskog i tužilačkog vijeća (VSTV BiH)** zahtijevamo da bez odgađanja poduzmu sljedeće mjere:

- VSTV BiH hitno formira radnu grupu ili komisiju koja će ispitati konkretne pritiske na sudije u ovim predmetima i pružiti im pravnu, profesionalnu i institucionalnu zaštitu.
- Da VSTV u saradnji sa nadležnim policijskim tijelima izvrši procjenu sigurnosti sudija koji postupaju u sporovima između BHRT-a i RTRS-a, i njihovih porodica te da im se po potrebi dodijele i mjere fizičke zaštite.
- Pozivamo Visokog predstavnika da iskoristi svoj autoritet i mandate kako bi sankcionisao političke zvaničnike koji direktno krše principe nezavisnosti pravosuđa i javno targetiraju nosioce pravosudnih funkcija.
- I na kraju, da obje institucije izdaju oštra i hitna saopštenja za javnost kojima osuđuju političku i medijsku hajku na sudije u Republici Srpskoj, šaljući jasnu poruku da je uplitanje u tekuće sudske postupke nedopustivo a "targetiranje" sudija i krivično djelo.

Napadi na sudije koji sude u sporovima koji se vode između BHRT-a i RTRS-a, kojima se daje iznimno veliki medijski prostor, predstavljaju direktan napad na vladavinu prava u Bosni i Hercegovini, a mogu dovesti i do ugrožavanja života. Aktuelne izjave i tekstovi podstiču javni linč i direktno ugrožavanje sudije i njene porodice zbog čega slučaj treba biti predmet ispitivanja policijskih agencija i tužilaštva. Neopravdano i agresivno etiketiranje sudija tokom otvorenih postupaka smatra se nedozvoljenim pritiskom na nezavisnost pravosuđa i vladavine prava u Bosni i Hercegovini.

Stoga bi pasivnost VSTV-a, krovnog pravosudnog regulatora i međunarodne zajednice, poslala opasnu poruku, odnosno omogućila bi da politička sila može suspendovati zakonitost i otvorila put ka anarhiji.

Očekujemo vašu hitnu reakciju.

v.d.generalni direktor BHRT-a
Belmin Karamehmedović

